

女科準繩 二之二

襍證門上

中風

飛尸血厥

癰瘰

顫振

驚悸

顛狂

血風煩悶

血風攻脾不能食

身體骨節疼痛

走疰痛

中風

藥隱云婦人中風角弓反張風痺手足不隨偏枯口
噤口眼喎斜風眩頭痛血風心神驚悸癲狂骨節風
血風走注瘙痒癰疹風痰諸證雖各有方論亦要先
明其大體察脈之虛實辨證之冷熱相人強弱入臟
入腑在絡在經首以方調治未要猛速用藥今之治
法先宜順氣然後治風萬不失一蓋有中風中寒中
暈中痰中氣皆能令人涎潮昏塞所謂朱紫相凌玉
石不分醫者不可不詳而究之如中風若作中氣治
之十愈八九中氣若作中風治之十無一生所以疑

惑之間不問中風中氣首以蘇合香丸五積散加麝
煎如中痰則有參蘇飲如中寒則有理中湯如中暈
則有白虎湯如的然是中風有三生飲木香煮散排
風續命風引大小竹瀝大八風湯辨其冷熱虛實而
投之未有不妥者也然此疾積襲之久非一日所能
致今人服藥三五服便責無効其責醫者亦速矣正
宜大劑久服方有其効孟子曰七年之病求三年之
艾也 大夫中風者虛風中於人也風是四時八方
之氣常以冬至之日自坎而起候其八方之風從其
鄉來者主長養萬物若不從其鄉來者名爲虛賊風

害萬物人體虛者則中之當時雖不卽發停在肌膚
後或重傷於風前後重沓因體虛則發入臟腑俞俞
皆在背中風多從俞入隨所中之俞而乃發病婦人
血氣虛損故令中風也當察口眼開闔以別重輕涎
沫有無以明證治如眼開口閉手足不開涎不作聲
者可治如眼閉口開聲如鼾睡遺尿不覺者死 按
卒仆暴厥之證不論男子婦人是風是寒是氣是食
是痰是濕但要分得閉與脫二證明白如牙關緊閉
兩手握固卽是閉證宜蘇合香丸三生飲之類開之
若口開手撒卽是脫證宜用大劑黃芪人參煎濃湯

灌之雖曰在法不治亦十救五六若誤服蘇合香丸之類卽不可救矣蓋斬關奪門之藥原爲閉證設若施之脫證是人旣入井而又下之石也

薛中風者卽內經所謂偏枯風痺風懿風痺是也而有中腑中臟中血脈之分焉夫中腑者爲在表中臟者爲在裏中血脈者爲在中在表者宜微汗在裏者宜微下在中者宜調榮中腑者多著四肢如手足拘急不仁惡風寒此數者病淺皆易治用加減續命湯之類中臟者多滯九竅如眼瞶者中于肝舌不能言者中于心唇緩便祕者中于脾鼻塞者中于肺耳聾

者中于腎此數者病深多難治中血脈者外無六經之證內無便溺之阻肢不能舉口不能言用大秦芩湯主之中腑者多兼中臟如左關脈浮弦面目青左脇偏痛筋脈拘急目瞶頭目眩手足不收坐踞不得此中膽兼中肝也用犀角散之類如左寸脈浮洪面舌赤汗多惡風心神顛倒言語謇澁舌強口乾忪悸恍惚此中小腸兼中心也用麻黃散之類如右關脈浮緩或浮大面唇黃汗多惡風口喎語澀身重怠惰嗜臥肌膚不仁皮肉瞶動腹膨不食此中胃兼中脾也用防風散之類如右寸脈浮濇而短面色白鼻流

清涕多喘胸中冒悶短氣自汗聲嘶四肢痿弱此中大腸兼中肺也用五味子湯之類如左尺脈浮滑面目黧黑腰脊痛引小腹不能俛仰兩耳虛鳴骨節疼痛足痿善恐此中膀胱兼中腎也用獨活散之類此皆言真中風也而有氣血之分焉蓋氣虛而中者由元氣虛而賊風襲之則右手足不仁用六君子湯加鈎藤薑汁竹瀝血虛而中者由陰血虛而賊風襲之則左手足不仁用四物湯加鈎藤竹瀝薑汁氣血俱虛而中者則左右手足皆不仁也用八珍湯加鈎藤薑汁竹瀝其與中風相類者則有中寒中濕中火中

氣食厥勞傷房勞等證如中於寒者謂冬月卒中寒
氣昏冒口噤肢攣惡寒脈浮緊用麻黃桂枝理中湯
之類中於暑者謂夏月卒中冒炎暑昏冒痿厥吐瀉喘
滿用十味香薷飲之類中於濕者丹溪所謂東南之
人多因濕土生痰痰生熱熱生風也用清燥湯之類
加竹瀝薑汁中於火者河間所謂非肝木之風內中
六淫之邪外侵良由五志過極火盛水衰熱氣拂鬱
昏冒而卒仆也用六味丸四君子獨參湯之類內有
恚怒傷肝火動上炎者用柴胡湯之類中於氣者由
七情過極氣厥昏冒或牙關緊急用蘇合香丸之類

誤作風治者死食厥者過於飲食胃氣自傷不能運
化故昏冒也用六君子加木香勞傷者過於勞役耗
損元氣脾胃虛衰不任風寒故昏冒也用補中益氣
湯房勞者因腎虛精耗氣不歸源故昏冒也用六味
丸此皆類中風者也夫內經主於風河間主於火東
垣主於氣丹溪主於濕愚之斯論僭補前人之闕也
若夫地之南北人之虛實固有不同其男子人大
畧相似當與後論參看通變治之

內方並見
雜病中風

靳閣

老夫人先胸脇脹痛後四肢不收自汗如水小便自
遺大便不實口緊目瞶飲食頗進十餘日矣或以爲

中臟公甚憂余曰非也若風旣中臟真氣旣脫惡證旣見禍在反掌焉能延之乃候其色面目俱赤面時或青診其脈左三部洪數惟肝尤甚余曰胸乳脹痛肝經血虛肝氣痞塞也四肢不收肝經血虛不能養筋也自汗不止肝經風熱津液妄泄也小便自遺肝經熱甚陰挺失職也大便秘不實肝木熾盛尅脾土也遂用犀角散四劑諸證頓愈又用加味逍遙散調理而安後因鬱怒前證復作兼發熱嘔吐飲食少思月經不止此木盛尅土而脾不能攝血也用加味歸脾湯爲主佐以加味逍遙散調補肝脾之氣清和肝脾

之血而愈後每遇怒或睡中手足抽搐復用前藥卽愈 大叅朱雲溪母於九月內忽仆地痰昧不省人事唇口喎斜左目緊小或用痰血之劑其勢稍緩至次年四月初其病復作仍進前藥勢亦漸緩至六月終病乃大作小便自遺或謂風中於臟以爲不治余診之左關弦洪而數此屬肝火血燥也遂用六味丸加五味子麥門芎歸一劑而飲食頓進小便頓調隨用補中益氣加茯苓山梔鉤藤丹皮而安至十月復以傷食腹痛作瀉左目仍小兩關尺脈弦洪鼓指余以六君加木香吳萸升麻柴胡一劑而痛瀉俱緩復

以六君加肉果故紙一劑諸脈頓平痛瀉俱止余謂
左關弦洪由肝火血燥故左目緊小右關弦洪由肝
邪乘脾故唇口喎斜腹痛作瀉二尺鼓指由元氣下
陷設以目緊口喎誤作風中投以風藥以腹痛泄瀉
誤作積滯投以峻劑復耗元氣爲害甚矣後以陽虛
惡寒圍火過熱致痰喘誤服寒劑而卒 一婦人因

怒仆地語言謇澁口眼喎斜四肢拘急汗出遺尿六
脈洪大肝脈尤甚皆由肝火熾盛蓋肝主小便因熱
甚而自遺也用加味逍遙散加鈞藤及六味丸尋愈
一老婦兩臂不遂語言謇澁服祛風之藥反致筋

攣骨痛余謂此肝火血虛所致用八珍湯補氣血用地黃丸補腎水佐以排風湯年餘而愈 一婦人經行口眼歪斜痰涎壅盛此血虛而肝火動用加味逍遙散加丹皮治之尋愈後因飲食停滯日吐痰涎此脾氣虛不能攝涎歸經也用六君子二十餘劑而安 一婦人因怒口眼喎斜痰涎上涌口噤發搐此脾肺氣虛而肝木旺用六君子加木香鈎藤柴胡治之漸愈又用加味歸脾湯調理而安 一產婦勤於女工忽仆地牙關緊急痰喘氣粗四肢不遂此氣血虛而發瘧朝用補中益氣加茯苓半夏夕用八珍加半

夏各三十餘劑不應此氣血之未復藥之未及也仍
用前二湯又五十餘劑尋愈 一婦人素性急患肝
風之證常服搜風順氣丸秦艽湯之類後因大怒吐
血唇口牽緊小便頻數或時自遺余以爲肝火旺而
血妄行遂用小柴胡湯加山梔牡丹皮漸愈五年之
後又大怒吐血誤服降火祛風化痰之劑大便秘數
胸滿少食用清氣化痰之劑嘔而不食頭暈口乾不
時吐痰用導痰降火之類痰出如涌四肢常冷余曰
嘔而不食胃氣虛弱也頭暈口乾中氣不能上升也
痰出如涌脾氣不能攝涎也四肢逆冷脾氣不能運

行也用補中益氣加茯苓半夏治之諸證漸愈又用加味歸脾湯兼服而安

陳癸丑春有一婦人年四

十二三其證語言氣短足弱行得數步則口若含霜七十日內三次經行則口冷頭目眩暈足冷則透心冷痛每行則口中冷氣不相續有時鼻中熱面赤翕然而熱身體不仁不能行步手足不隨不能俛仰冷痺骨疼有時悲傷夢與前夫相隨則上氣奄然而極心驚志意不定恍惚多忘却能食如此僅一年許醫者投熱藥則而翕然而熱氣滿胸中咽中窒塞悶絕投冷藥則瀉又一醫者以十全湯服之則發煩躁心

驚而跳一醫以雙和湯服之覺面上與腹中如火燂
心愈驚欲吐不吐大便秘裏急後重求僕診之六脈
弦緩喜見於春此是可治之疾未供藥間忽然吐瀉
瀉後覺肛門如火雖瀉却不多僕且與俞山人降氣
湯八服次日診之脈差有力云服藥後覺鼻熱心煩
悶齒噤與參蘇飲八服黃連圓壹兩越三日云服藥
後如故與茯苓補心湯服皆無効僕以脈證詳之只
是排風湯甚對或曰何以知之一能飲食此風飢也
二七十日三次經行此是榮經有風血得風散也三
頭目眩暈此肝風也四面赤翕然而熱悲傷此心風

也五身體不仁不能行步夢與前夫相隨此脾風也
六手足不隨腰痛難俛仰冷痺骨疼此腎風也因令
人心驚恍忽多忘真排風湯證也或曰風脈當浮今
脈弦緩微弱恐非風也予曰風無一定之脈大抵此
證虛腎生風然排風湯藥品有十全大補湯料亦有
平補之資却不僭燥供十服越三日云服有効脈亦
差勝只是腹中如烟生微熱大便秘此真是風證再
與排風湯服加牛黃清心丸阜角圓助之越三日云
服前藥大煩躁發熱諸證悉除只是足弱不能支持
與祕傳降氣湯十服諸證悉退只是夢裏虛驚大便